

Na osnovu čl. 10. i 12. Zakona o udruženjima i fondacijama Bosne i Hercegovine ("Službeni glasnik BiH", br. 32/01, 42/03 i 63/08,76/11 i 94/16) Osnivačka skupština "Udruženja OTORINOLARINGOLOGA I HIRURGA GLAVE I VRATA U BiH" na sjednici održanoj dana 19.12.2022. godine u Sarajevu donijela je

## **STATUT "UDRUŽENJA OTORINOLARINGOLOGA I HIRURGA GLAVE I VRATA U BiH"**

### *Član 1.*

Udruženje je osnovano Odlukom o osnivanju donesenoj na sjednici Osnivačke skupštine "Udruženja OTORINOLARINGOLOGA I HIRURGA GLAVE I VRATA U BiH" (u daljem tekstu: Udruženje), dana 19.12.2022. g. u Sarajevu, a u skladu sa Zakonom o udruženjima i fondacijama Bosne i Hercegovine ( u daljem tekstu: Zakon).

Ovim statutom uređuje se:

1. Naziv Udruženja, skraćeni naziv i adresa Udruženja;
2. Ciljevi i djelatnosti Udruženja;
3. Postupak za primanje i isključivanje članova;
4. Organi udruženja, način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove skupštinu, uslovi i način raspuštanja odnosno prestanka rada;
5. Pravila za ostvarivanje, korištenje i raspolaganje sredstvima Udruženja, kao i organ koji je ovlašten za nadzor nad korištenjem tih sredstava;
6. Način podnošenja izvještaja o finansijskom poslovanju i izvještaja o radu;
7. Javnost rada
8. Postupak za izmjenu i dopunu statuta, ovlaštenje i način donošenja drugih općih akata
9. Opis oblika i sadržaj pečata i znaka udruženja
10. Zastupanje udruženja
11. Uslovi i postupak za spajanje, podjelu odnosno prestanak rada udruženja uključujući i bilo kakav poseban kvorum ili pravila za postizanje kvalifikovane većine u postupku glasanja
12. Postupak za raspolaganje preostalim imovinom ili drugim sredstvima u slučaju raspuštanja ili prestanka rada udruženja

### *Član 2.*

Udruženje je nezavisno, nevladino, nestranačko, nereligijsko i neprofitno udruženje.

### *Član 3.*

Udruženje stiče status pravnog lica danom upisa u Registar udruženja Ministarstva pravde Bosne i Hercegovine.

### **1. NAZIV UDRUŽENJA, SKRAĆENI NAZIV I ADRESA UDRUŽENJA**

### *Član 4.*

Puni naziv Udruženja na tri službena jezika i dva pisma koja su u upotrebi u BiH je:

**Udruženje " OTORINOLARINGOLOGA I HIRURGA GLAVE I VRATA U BiH"**

**Удружење " ОТОРИНОЛАРИНГОЛОГА И ХИРУРГА ГЛАВЕ И ВРАТА У БиХ"**

## **Udruga "OTORINOLARINGOLOGA I KIRURGA GLAVE I VRATA U BiH"**

Skraćeni naziv Udruženja na tri službena jezika i dva pisma koja su u upotrebi u BiH je:

**Udruženje ORL U BiH**

**Удружење ОРЛ У БиХ**

**Udruga ORL U BiH**

### *Član 5.*

**Sjedište Udruženja je u Sarajevu, općina Centar, ulica Kranjčevićeva broj 12 (Opća bolnica Sarajevo, ORL odjel).**

### *Član 6.*

Udruženje djeluje na cijelom području Bosne i Hercegovine.

## **2. CILJEVI I DJELATNOSTI UDRUŽENJA**

### *Član 7.*

Udruženje je stručno i naučno / znanstveno Udruženje koje okuplja ljekare/liječnike u BiH koji se bave dijagnostikom i liječenjem bolesti uha, nosa i grla. Osnovano radi praćenja razvoja i dostignuća medicinskih i srodnih nauka, javnog istupanja, organizovanja stručnih sastanaka i rasprava, seminara, simpozijuma, kongresa kao i uspostavljanje saradnje i kontakata s programima otorinolaringoloških udruženja u drugim zemljama. Ciljevi i djelatnosti Udruženja su sljedeći:

- promoviranje legalnih interesa članova Udruženja,
- rad na edukaciji i informisanje članova Udruženja
- praćenje razvoja i dostignuća medicinskih i srodnih nauka i upoznavanja članova s tim dostignućima u cilju unapređivanja njihovih znanja i osposobljavanja,
- zajednički rad sa svim nivoima vlasti kada je u pitanju otorinolaringološka djelatnost,
- zajednički rad i razmjena iskustava sa medicinskim institucijama u Bosni i Hercegovini,
- pomoć u organizovanju edukacije medicinskim radnicima iz cijele Bosne i Hercegovine iz oblasti Otorinolaringologije i hirurgije/kirurgije glave i vrata,
- uspostavljanje saradnje i kontakata sa otorinolaringološkim programima udruženja iz Evrope i svijeta,
- zalaganje za ostvarivanje zajedničkih interesa članova Udruženja.

Utvrđene ciljeve, Udruženje ostvaruje na način određen Zakonom, ovim Statutom i drugim općim aktima.

U ostvarivanju svojih ciljeva Udruženje se neće uključivati u predizborne kampanje niti će prikupljati sredstva za kandidate ili za finansiranje političkih stranaka.

## **3. POSTUPAK ZA PRIMANJE I ISKLJUČIVANJE ČLANOVA**

### *Član 8.*

Članovi udruženja mogu biti redovni, vanredni i počasni.

Redovni član udruženja može postati ljekar/ liječnik otorinolaringolog i cervikofacijalni hirurg/kirurg ili specijalizant otorinolaringologije koji popuni i svojeručno potpiše pristupnicu.

Verifikacija članstva se vrši na skupštini Udruženja.

Vanredni članovi Udruženja mogu biti ljekari/ liječnici otorinolaringolozi i cervikofacijalni hirurzi / kirurzi iz inostranstva.

Počasni članovi udruženja mogu biti pojedinci, organizacije i institucije koje pružaju materijalnu ili drugu pomoć udruženju u realizaciji zadataka i obaveza, te umirovljeni članovi udruženja.

Odluku o dodjeljivanju počasnog članstva donosi Skupština Udruženja.

Udruženje je dužno voditi spisak svojih članova. Popis članova Udruženja vodi se elektronski ili na drugi odgovarajući način i sadrži:

- a. Ime, prezime, odnosno naziv člana s adresom prebivališta, odnosno sjedišta
- b. Datum pristupanja i broj pristupnice Udruženja
- c. Vrstu članstva Udruženja u skladu sa Statutom
- d. Datum prestanka članstva u Udruženju

Predsjednik Udruženja je ovlašten da evidenciju članova Udruženja da na uvid nadležnim organima na njihov zahtjev bez saglasnosti Skupštine Udruženja.

#### *Član 9.*

Članstvo u Udruženju je dobrovoljno i ostvaruje se potpisivanjem pristupnice Udruženja koja je dostupna na web stranici Udruženja.

#### *Član 10.*

Članstvo u Udruženju prestaje:

- istupanjem člana iz Udruženja,
- isključenjem člana iz Udruženja,
- težom povredom odredbi Statuta i drugih općih akata,
- u slučaju smrti,
- prestankom rada Udruženja
- prestankom plaćanja članarine u toku jedne godine.

#### *Član 11.*

Svaki član Udruženja može istupiti iz Udruženja, na osnovu pismene izjave o istupanju koju dostavlja Predsjedniku Udruženja.

#### *Član 12.*

Isključenje iz članstva se vrši u slučaju kada je član Udruženja teže povrijedio odredbe ovog Statuta ili drugih pravila Udruženja ili ako djeluje protivno ciljevima i interesima Udruženja.

Odluku o prestanku svojstva člana Udruženja donosi Predsjednik Udruženja.

Lice koje je nezadovoljno odlukom iz prethodnog stava, može podnijeti žalbu u pisanom obliku Skupštini Udruženja u roku od 15 dana od dana prijema odluke.

Na prvoj narednoj sjednici skupštine Udruženja, Skupština razmatra žalbu iz prethodnog stava i donosi konačnu odluku.

#### *Član 13.*

Članovi Udruženja imaju sljedeća prava i obaveze:

- da biraju i da budu birani u organe Udruženja,
- da aktivno učestvuju u ostvarivanju ciljeva Udruženja,
- da budu redovno i blagovremeno obavještavani o aktivnostima Udruženja,
- da sarađuju sa ostalim članovima Udruženja,
- da čuvaju i podižu ugled Udruženja,
- da uredno plaćaju članarinu i izvršavaju druge preuzete obaveze
- da ostvaruju druga prava i dužnosti utvrđene Statutom i opštim aktima Udruženja.

#### **4. ORGANI UDRUŽENJA, NAČIN NA KOJI SE BIRAJU, OVLAŠTENJA KOJA IMAJU, KVORUM I PRAVILA GLASANJA, TRAJANJE MANDATA, LICE OVLAŠTENO DA SAZOVE SKUPŠTINU, USLOVI I NAČIN RASPUŠTANJA, ODNOSNO PRESTANAK RADA**

#### *Član 14.*

Organi Udruženja su:

- Skupština Udruženja
- Predsjednik Udruženja
- Potpredsjednik Udruženja

Najviši organ Udruženja je Skupština, koju čine redovni članovi Udruženja.

#### *Član 15.*

Skupština je organ upravljanja Udruženja, koji čine redovni članovi Udruženja.

Radom skupštine rukovodi predsjednik Skupštine kojeg bira i razrješava skupština prostom većinom glasova.

Ukoliko predsjednik skupštine Udruženja nije u mogućnosti da prisustvuje sjednici, prisutni redovni članovi će za potrebu održavanja te sjednice prostom većinom glasova izabrati vršioca dužnosti predsjednika skupštine.

Mandat predsjednika skupštine Udruženja traje četiri godine s mogućnošću reizbora.

Predsjednik Skupštine:

- a) Predlaže dnevni red sjednice;
- b) Predsjedava sjednicama Skupštine;
- c) Potpisuje akte donesene na Skupštini
- d) Stara se o izvršenju odluka, zaključaka i drugih akata Skupštine.

Skupština Udruženja se sastaje na sjednicama i to na kako na redovnim tako i na vanrednim sjednicama. Redovna sjednica održava se najmanje jednom u toku kalendarske godine i razmatra godišnji izvještaj o radu Udruženja.

Vanredna sjednica se saziva izuzetno, u slučajevima nepredviđenih teškoća u radu, poremećaju međuljudskih odnosa u organizaciji ili drugih okolnosti kada je ugrožen rad i vitalni interesi Udruženja. Način rada skupštine utvrđuje se Poslovníkom o radu skupštine.

Skupština donosi odluke glasanjem i to prostom većinom, ukoliko ovim statutom za pojedina pitanja nije drugačije regulirano.

Predsjednik Skupštine je dužan sazvati Skupštinu u slučaju kada to zahtjeva najmanje 1/3 članova Skupštine ili kada to zatraži Predsjednik Udruženja najmanje 15 dana prije njenog zasjedanja.

U izvanrednim okolnostima Skupština se može održati i elektronskim putem.

Ukoliko se skupština održava elektronski Predsjednik skupštine će u pozivu pored osnovnih podataka naznačiti da će se skupština održati elektronski kao i način elektronskog održavanja i praćenja sjednice (putem Skype, Zoom aplikacije, konferencijskog poziva ili na drugi pogodan način) te naznačiti da će ista biti snimana putem audio i/ili video zapisa.

Skupština ima kvorum za odlučivanje ukoliko sjednici prisustvuje najmanje 2/3 od svih članova skupštine Udruženja.

Skupština bira zapisničara na početku rada sjednice koji vodi zapisnik. Zapisnik mora da odražava bitan tok rada i suštinu svih odluka i stavova.

Radom Skupštine rukovodi predsjednik Skupštine, koji priprema sjednice Skupštine, te obavlja druge poslove, predviđene Statutom i aktima Udruženja.

Skupština radi i odlučuje na osnovu Pravilnika o radu. Pravilnik o radu se usvaja na prvoj sjednici Skupštine.

Svaki član Udruženja, kod odlučivanja na sjednici Skupštine, ima 1 (jedan) glas.

Izjašnjavanje na sjednici Skupštine je javno.

Predsjednik Skupštine može biti razriješen i prije kraja mandata ukoliko:

- Podnese ostavku
- Djeluje suprotno programskim ciljevima Udruženja,
- Ekscesnim radnjama i svojim ukupnim ponašanjem ruši ugled Udruženja,

#### *Član 16.*

##### **Skupština Udruženja:**

- donosi Statut, izmjene i dopune Statuta i druga akta Udruženja određena Statutom,
- daje saglasnost na pravne radnje poduzete u postupku osnivanja Udruženja,
- imenuje i razrješava predsjednika skupštine Udruženja, predsjednika i potpredsjednika Udruženja
- usvaja izvještaje koje je pripremio lice ovlašteno za zastupanje i predstavljanje,
- odlučuje o udruživanju u saveze, spajanju, podjeli, prestanku rada i drugim statusnim pitanjima,
- usvaja godišnji program i plan rada Udruženja i strateški plan Udruženja,
- donosi finansijski plan Udruženja,
- usvaja završni račun Udruženja,
- obavlja druge poslove i zadatke u skladu sa zakonom, ovim Statutom i drugim općim aktima Udruženja,
- imenovanje i razrješavanje organa upravljanja Udruženjem.

#### *Član 17.*

Sjednice Skupštine Udruženja održavaju se kao redovno zasjedanje ili vanredno zasjedanje.

#### *Član 18.*

Redovno zasjedanje se održava jednom godišnje.

Vanredno zasjedanje se može zakazati samo u sljedećim slučajevima:

- na zahtjev Predsjednika Udruženja,
- na zahtjev članova Udruženja sa najmanje jednom trećinom glasova koji predlažu sazivanje zbog: isključenja člana Udruženja, izmjena Statuta Udruženja i prestanka rada Udruženja

#### *Član 19.*

Svaki član Udruženja može prisustvovati Skupštini lično ili putem zastupnika, drugog člana Skupštine, na osnovu pismene punomoći za zastupanje.

#### *Član 20.*

Skupština Udruženja ima kvorum za rad ako Skupštini prisustvuje, lično ili putem zastupnika, polovina od ukupnog broja članova.

#### *Član 21.*

Ako na zakazanu sjednicu Skupštine ne pristupi više od polovine ukupnog broja članova Udruženja, po isteku jednog sata od vremena određenog za početak rada Skupštine, Skupština može punovažno odlučivati ako je prisutna najmanje 1/3 od ukupnog broja članova Udruženja.

### **Predsjednik Udruženja**

#### *Član 22.*

Predsjednika Udruženja bira Skupština, na mandatni period od četiri godine. Predsjednik Udruženja za svoj rad odgovara Skupštini.

Predsjednik Udruženja je naredbodavac za izvršenje finansijskog plana Udruženja i odgovoran za zakonitost rada Udruženja.

Predsjednik Udruženja može biti razrješen i prije kraja mandata ukoliko:

- podnese ostavku
- djeluje suprotno programskim ciljevima Udruženja,
- ekscenim radnjama i svojim ukupnim ponašanjem ruši ugled Udruženja,

#### *Član 23.*

Predsjednik Udruženja je obavezan da poslovanje Udruženja vodi po mjerilima zakona, odredbama Statuta Udruženja i odlukama Skupštine Udruženja.

#### *Član 24.*

Predsjednik Udruženja ima prava, dužnosti i odgovornosti:

- predstavlja i zastupa Udruženje,
- organizuje rad Udruženja,
- priprema dnevni red za sjednicu Skupštine Udruženja,
- vodi administrativno i finansijsko poslovanje Udruženja,
- upravlja imovinom Udruženja,
- podnosi godišnji izvještaj o radu udruženja i finansijski izvještaj Udruženja,
- saziva sjednice Skupštine Udruženja i predsjedava sjednicama,
- obavještava javnost o radu Udruženja,
- stara se o zakonitosti rada Udruženja
- učestvuje u pripremi, predlaganju i realizaciji programa rada Udruženja,
- priprema i predlaže mjere i aktivnosti za razvoj i unapređenje rada Udruženja, potpisuje akte i odluke i druge pisane dokumente iz nadležnosti Skupštine Udruženja,
- uspostavlja i razvija saradnju sa drugim organizacijama, udruženjima i ustanovama,
- ostvaruje kontakte sa preduzećima (firmama), ustanovama, institucijama i drugim pravnim i fizičkim licima u cilju obezbjeđivanja sponzorstva za aktivnost Udruženja,
- vrši i druge poslove za koje je ovlašten Statutom ili koje mu povjeri Skupština Udruženja.

#### *Član 25.*

Potpredsjednika Udruženja bira skupština na mandatni period od 4 godine. Potpredsjednik Udruženja za svoj rad odgovara skupštini.

Potpredsjednik Udruženja u slučaju spriječenosti predsjednika Udruženja ima ista prava, dužnosti i obaveze kao i predsjednik Udruženja.

#### *Član 26.*

Predsjednik Udruženja predstavlja i zastupa Udruženje u zemlji i inostranstvu, provodi odluke, programe i preporuke svjetske asocijacije ljekarskih udruženja za otorinolaringologiju, Svjetske zdravstvene organizacije.

#### *Član 27.*

Predsjednik Udruženja, Potpredsjednik i Predsjednik skupštine se biraju javnim ili tajnim glasanjem na mandate od četiri (4) godine. Kandidata za Predsjednika Udruženja, Potpredsjednika i Predsjednika skupštine može predložiti bilo koji član Udruženja.

## **5. PRAVILA ZA OSTVARIVANJE , KORIŠTENJE I RASPOLAGANJE SREDSTVIMA UDRUŽENJA, KAO I ORGAN KOJI JE OVLAŠTEN ZA NADZOR NAD KORIŠTENJEM TIH SREDSTAVA**

### *Član 28.*

Udruženje može sticati prihode iz sljedećih izvora:

- članarine;
- dobrovoljnih priloga i poklona fizičkih i pravnih lica, kako u gotovini tako i u imovini i uslugama;
- ugovora sa javnim institucijama, fizičkim i pravnim licima;
- prihoda od kamata, dividendi, dobiti od kapitala, zakupnina, honorara i sličnih izvora;
- prihoda stečenih kroz ostvarivanje ciljeva i aktivnosti Udruženja, u skladu sa ovim Statutom.
- drugih izvora u skladu sa važećim zakonima.

### *Član 29.*

Imovinu Udruženja čine: prava, stvari i novac, koje Udruženje stiče u skladu sa Zakonom i Statutom.

### *Član 30.*

O sticanju prihoda, korištenju imovine i raspolaganju sredstvima Udruženja odlučuje predsjednik Udruženja u skladu s ovim Statutom i općim aktima Udruženja koje donosi Skupština.

### *Član 31.*

Predsjednik Udruženja je dužan, najmanje jednom godišnje, podnijeti Skupštini Udruženja izvještaj sa podacima o imovini Udruženja, korištenju imovine, приходима i rashodima Udruženja i drugim pitanjima od značaja za raspolaganje imovinom i za finansijsko poslovanje Udruženja.

### *Član 32.*

Udruženje raspolaže svojom imovinom u skladu sa ovim Statutom i Zakonom. Nadzor nad finansijskim poslovanjem Udruženja vrši Skupština Udruženja.

### *Član 33.*

Lice ovlašteno da potpisuje akte koji se odnose na sticanje i raspolaganje imovinom Udruženja i na finansijsko poslovanje je: Predsjednik Udruženja ili drugo lice koje ovlasti Skupština.

### *Član 34.*



Skupština Udruženja može donijeti opće akte kojima se, u skladu sa ovim Statutom, bliže uređuju pravila za ostvarivanje, korištenje i raspolaganje sredstvima Udruženja i za nadzor nad korištenjem tih sredstava.

## **6. NAČIN PODNOŠENJA FINANSIJSKOG IZVJEŠTAJA I IZVJEŠTAJA O RADU**

### *Član 35.*

U Udruženju se vodi računovodstvo u skladu sa općeprihvaćenim računovodstvenim principima, kojim se osiguravaju pravovremene, potpune i tačne informacije i priprema izvještaja o poslovanju, prihodima i rashodima, imovini, kapitalu i obavezama Udruženja, za potrebe organa Udruženja i nadležnih državnih organa i drugih ovlaštenih organizacija. Godišnji finansijski izvještaj Udruženja podnosi se Skupštini najmanje 30 dana prije održavanja iste.

Udruženje je dužno dostaviti finansijski godišnji izvještaj o radu nadležnom organu prema sjedištu Udruženja i Ministarstva pravde BiH radi objave na internetskoj stranici Ministarstva, a najkasnije do 30.04. tekuće godine za prethodnu poslovnu godinu. Nad imovinom Udruženja može se provesti stečaj. Stečajni postupak provodi nadležni sud na čijem se području nalazi sjedište Udruženja u skladu s posebnim zakonima.

### *Član 36.*

U sjedištu Udruženja, u rokovima utvrđenim zakonom ili odlukama skupštine Udruženja, obavezno se čuvaju sljedeći dokumenti: Statut Udruženja; godišnji i polugodišnji obračun poslovanja Udruženja, sa bilansom uspjeha; zapisnici i odluke skupštine i predsjednika Udruženja; akti tekuće korespondencije i drugi akti vezani za rad i poslovanje Udruženja.

## **7. JAVNOST RADA**

### *Član 37.*

Rad Udruženja je javan.

Javnost rada Udruženja ostvaruje se na način utvrđen zakonom i ovim Statutom.

### *Član 38.*

Organi Udruženja su dužni da ovlaštenim predstavnicima sredstava informisanja učine dostupnim podatke, informacije i isprave koje se odnose na rad Udruženja.

Predstavnici sredstava informisanja imaju pravo da prisustvuju sjednicama organa Udruženja i da izvještavaju o radu tih organa.

### *Član 39.*

Članovi Udruženja imaju pravo da budu redovno informisani o radu Udruženja. O informisanju članova Udruženja stara se predsjednik Skupštine.

#### *Član 40.*

Izuzetno, općim aktom koji donosi Skupština može se utvrditi da pojedine informacije, podaci i isprave, predstavljaju poslovnu tajnu. Istim aktom mogu se utvrditi odgovorna lica za korištenje i zaštitu informacija koje imaju karakter poslovne tajne.

Za poslovnu tajnu ne mogu se odrediti podaci koji su javni po zakonu i drugim propisima, kao i podaci o kršenju zakona i drugih propisa.

### **8. POSTUPAK ZA IZMJENU I DOPUNU STATUTA, OVLAŠTENJE I NAČIN DONOŠENJA DRUGIH OPĆIH AKATA**

#### *Član 41.*

Inicijativu za izmjene i dopune Statuta može podnijeti svaki član Udruženja. Inicijativa se podnosi Skupštini pismenim putem i sa odgovarajućim obrazloženjem.

#### *Član 42.*

Prijedlog za izmjene i dopune Statuta utvrđuje predsjednik Udruženja. Utvrđeni prijedlog dostavlja se Skupštini Udruženja, pismenim putem i sa odgovarajućim obrazloženjem, najmanje 30 dana prije dana održavanja sjednice Skupštine.

#### *Član 43.*

O izmjenama i dopunama Statuta odlučuje Skupština, većinom glasova od ukupnog broja prisutnih članova Udruženja.

#### *Član 44.*

Predsjednik Udruženja potpisuje 4 primjerka Odluke o izmjenama i dopunama Statuta, koji se smatraju originalima i čuvaju se u arhivi Udruženja.

#### *Član 45.*

Izmjene i dopune ovog Statuta donose se po istom postupku po kojem se donosi i Statut. Statut, kao i izmjene i dopune Statuta i druge opće akte Udruženja priprema Skupština Udruženja. Izmjene i dopune Statuta i druge opće akte donosi Skupština Udruženja.

### **9. OPIS OBLIKA I SADRŽAJ PEČATA I ZNAKA**

#### *Član 46.*

Udruženje ima svoj pečat i znak. Pečat je okruglog oblika promjera 30 mm sa kružno upisanim nazivom: “ Udruženje otorinolaringologa i hirurga glave i vrata u Bosni I Hercegovini ”. Pored naziva Udruženja upisano je i sjedište Udruženja: ulica Kranjčevićeva 12, Sarajevo. U sredini se nalazi znak udruženja. Znak udruženja je okruglog oblika koji je podijeljen u pet dijelova ( krugova) od kojih je prvi vanjski ispunjen tamnoplavom bojom, te u gornjem dijelu sadrži naziv Udruženja na bosanskom, hrvatskom i srpskom jeziku ispisano latiničnim i ćiriličnim pismom, drugi i četvrti krug su bijele boje, treći plave boje, a prvi unutrašnji krug je u lijevom dijelu ispunjen žutom bojom, u centralnom dijelu se nalazi kontura ljudske glave i vrata u plavo-bijeloj kombinaciji boja. Primjerak znaka je prikazan u prilogu 1 ovog Statuta i čini njegov sastavni dio.

Pečat se koristi u pravnom prometu u skladu sa zakonom.

### **10. ZASTUPANJE UDRUŽENJA**

#### *Član 47.*

Predsjednik i potpredsjednik Udruženja su ovlaštene osobe za zastupanje i predstavljanje Udruženje u pravnom prometu, a u skladu sa odredbama ovog Statuta, Odlukama Skupštine Udruženja, te pozitivnim zakonskim propisima.

#### *Član 48.*

U postupcima u kojima Udruženje učestvuje kao strana radi ostvarivanja svojih prava, dužnosti i odgovornosti pred nadležnim organima, izrade Statuta, dopuna i izmjena Statuta, predsjednik Udruženja može dati pismenu punomoć za zastupanje advokatu ili drugom stručnom licu.

### **11. USLOVI I POSTUPAK ZA SPAJANJE, PODJELU ODNOSNO PRESTANAK RADA UDRUŽENJA UKLJUČUJUĆI I BILO KAKAV POSEBAN KVORUM ILI PRAVILA ZA POSTIZANJE KVALIFIKOVANE VEĆINE U POSTUPKU GLASANJA**

#### *Član 49.*

Udruženje se može spojiti ili podijeliti u drugo udruženje.

Spajanje je osnivanje novog udruženja na koje prelazi cjelokupna imovina tri ili više udruženja koja se spajaju. Spajanjem udruženja prestaju da postoje, a na postupak upisa novonastalog udruženja primjenjuju se odredbe ovog zakona koje se odnose na osnivanje udruženja.

Udruženje se može podijeliti na dva ili više udruženja. Podijeljeno udruženje prestaje da postoji, a na postupak upisa novonastalih udruženja primjenjuju se odredbe ovog zakona koje se odnose na osnivanje udruženja.

#### *Član 50.*

Odluko o spajanju ili podjeli udruženja donosi skupština udruženja na prijedlog predsjednika Udruženja.

Odlukom iz prethodnog stava se reguliše naročito:

- naziv Udruženja kome se Udruženje spaja, dijeli ili naziv Udruženja nakon transformacije u Udruženje od javnog interesa;
- podjela imovine, prava i obaveza
- daje ovlaštenje predsjedniku Udruženja ili trećem licu za provedbu odluke
- rok za provedbu odluke
- utvrđuju eventualni uslovi pod kojim može doći do spajanja, dijeljenja ili transformiranja

#### *Član 51.*

Odluka iz prethodnog člana Statuta smatra se usvojenom kada je na sjednici Skupštine Udruženja za nju glasala prosta većina od ukupnog broja prisutnih članova Udruženja.

#### *Član 52.*

Udruženje može osnovati svoje kancelarije, predstavništva i podružnice u skladu sa odredbama statuta.

#### *Član 53.*

Udruženje može prestati s radom dobrovoljno ili po sili Zakona.

#### *Član 54.*

Udruženje prestaje s radom dobrovoljno, ako Skupština dvotrećinskom većinom svih članova Udruženja donese odluku o prestanku rada Udruženja.

Udruženje prestaje po sili zakona ako:

- a. je proteklo dvostruko više vremena od vremena utvršenog statuom Udruženja za održavanje skupštine Udruženja, a skupština nije održana
- b. se broj članova Udruženja smanji ispod broja tri (3), a nadležni organ udruženja u roku od 3 mjeseca od nastupanja ove okolnosti ne donese odluku o prijemu novih članova udruženja

Udruženje se briše iz registra kada rješenje o prestanku rada udruženja koje donese Ministarstvo postane konačno ili kad Sud Bosne i Hercegovine donese pravosnažnu presudu o zabrani rada Udruženja.

## **12. POSTUPANJE SA IMOVINOM UDRUŽENJA U SLUČAJU PRESTANKA RADA UDRUŽENJA**

*Član 55.*

Istovremeno s odlukom o raspuštanju Udruženja, Skupština donosi plan likvidacije Udruženja, kojim se utvrđuje raspored imovine, prava i obaveze Udruženja, u skladu sa Statutom Udruženja.

Skupština imenuje likvidatora Udruženja čija dužnost je da se stara o izvršenju plana likvidacije i koji je ovlašten da zastupa Udruženje u postupku likvidacije i u podnošenju zahtjeva za prijavu prestanka rada Udruženja nadležnim organima.

*Član 56.*

U postupku likvidacije Udruženja iz imovine Udruženja izmiriće se sve obaveze, kao i obaveze Udruženja po osnovu javnih prihoda kao i obaveze nastale prema trećim licima povjeriocima udruženja. Preostala imovina i sredstva podijelit će se na način utvrđen Statutom, drugom registriranom Udruženju koje ima iste ili slične ciljeve i djelatnosti u skladu s odlukom o prestanku rada udruženja.

Lice ovlašteno za zastupanje Udruženja lično dužno je u roku od 30 dana od dana kada je Udruženje prestalo djelovati dostaviti Ministarstvu zahtjev o dokazima o prestanku rada Udruženja.

Lice ovlašteno za zastupanje može ovlaštenje za radnje iz prethodnog člana povjeriti trećem licu.

**ZAVRŠNE ODREDBE**

*Član 57.*

Za tumačenje odredbi ovog Statuta nadležna je Skupština Udruženja.

Za sve što nije regulirano ovim statutom primjenjuju se opći akti Udruženja odnosno relevantni zakonski propisi.

*Član 58.*

Ovaj Statut stupa na snagu danom donošenja, a primjenjivat će se od dana upisa u registar udruženja kod nadležnog Ministarstva.

Broj 2/22

Sarajevo, 19.12.2022

**PREDSJEDNIK OSNIVAČKE SKUPŠTINE UDRUŽENJA**

Mersiha Bećirović